

四庫全書

集部

欽定四庫全書

集部

林蕙堂全集卷二十二

詳校官檢討

臣

劉錫五

助教

臣

常循覆勘

總校官編修

臣

王燕緒

校對官助教

臣

卜維吉

謄錄監生

臣

戴典

欽定四庫全書

林蕙堂全集卷二十二

湖州府知府吳綺撰

亭皋詩集

七言絕句

采菱曲

新婦磯頭蘸綠波
采蓮何似采菱多
蓮心有味郎嫌苦
菱刺鈎衣郎奈何

又

濁水菱肥清水鮮就中清濁任郎牽無端驚起鴛鴦睡
衝破儂家鏡裏天

韓信

一飯蕭條楚水濱功成鐘室竟亡身英雄事業輕劉項
成敗無端屬婦人

明妃

莫怨妍媸向畫中明妃薄命在和戎便教寫得傾城貌

未必君恩冠後宮

丈君

解妬從來屬賞音
阿嬌徒自費黃金
獨憐一首長門賦
不及丈君幾字吟

漢宮秋水圖

紅衣落盡冷青蘋
太液秋風起碧鱗
惆悵永和香輦散
白頭宮監更何人

題谿山圖

萬山深處亂泉流土室茅亭事事幽絕似故鄉全盛日
任公溪上盪扁舟

七夕前一日為織女催粧

銀漢迢迢一道斜青牛待駕紫雲車明朝便是經年別
莫誤風前吉慶花

題蓉江女子所畫碧桃

露井東風拂素羅一枝檐畔粉香多自從誤賺漁郎後
淨洗春紅學素娥

題李夫人畫芙蓉

江上晴波望若空
芙蓉含笑颭秋風
等閒輸與鴛鴦鳥
卧看明粧晚鏡中

玫瑰

一叢深艷傍迴廊
偏稱鸞釵墮馬粧
珊枕睡殘紅雨落
為郎還作紫羅囊

茉莉

香清粉淡海南來
夏晚爭持傍鏡臺
摘得含苞郎最愛

向儂頭上看花開

明妃

深宮歲歲閉容輝
一出榆關便不歸
不為無金買圖畫
至今誰更識明妃

友人有賦磁盃鞋者戲作二首

誰把縹磁代藕絲
鳳尖長惹露華滋
就中最有相如渴
憶殺當壚小立時

又

掌中傳送幾摩挲，絕勝陳王見襪羅。
不是定州新製巧，風流原在醉鄉多。

趙孟遷自題小像曰方朔再見之圖為書斷句
七十騎驢上帝臺，朗吟長嘯口常開。
奚奴辟易驚狂客，知是先生岸幘來。

紀事

寒鳥驚飛月影昏，土牀孤枕欲銷魂。
夢中不識相思路，又逐西風過里門。

見人扇頭是友沂絕句愴然和之

更誰紅淚掩蟬紗公子埋香隔歲華今日臨風展遺墨
教人腸斷刺桐花

又

歌板當年出絳紗綠腰紅袖盡鉛華只留便面春風在
曾向章臺拂柳花

友人納姬戲為催粧姬汪姓南人也

蛺蝶輕羅押蒜金燈前小立倚瑤琴桃花潭水兒家住

只問郎情深不深

又

別樣雙蛾柳葉勻
輕迴蟬翼掩羅巾
柔條一樣江南種
北地逢春更着人

又

碧天何處是明河
靈鵲差排此夜過
低囑侍兒休索問
古來司馬自情多

又

新粧綽約下鳴機
夫壻東方世所稀
儂自有香名意可
不煩小玉護朝衣

題畫

密篠千竿翠繞籬
草堂清晝篆香遲
殘書未了秋聲動
正是前山欲雨時

又

怪石頽雲勢不平
西風捲出大江聲
漁郎醉卧蘆花裏
笑指魚龍觸浪行

入署偶吟

新換頭銜騎省郎，終朝驅馬看人忙。
鏤花繡盡黃金鑰，贏得殘書疊印牀。

又

平明初下紫宸班，錦署無營晝掩關。
閒拂案塵攤好句，一杯涼雪祭椒山。

快雪堂觀劇

魚藻池邊秋夜清，玉船徐引燭花明。
不知何處春風起，吹動池邊柳絮輕。

吹出雛鶯百轉聲

又

西園清燕好留連
翠管紅絃不曙天
看到舞腰低轉處
不妨人喚柘枝顛

猶記

猶記香風起栢梁
簪裾高會有篇章
無端賦就神仙事
空拍紅雲拜玉皇

又

太液波通瀛海潮
靈鯢行處御香飄
一從畫楫無人倚
荷葉高平玉螭橋

又

獸環金蝕繡苔班
頭白監門盡日間
零落上陽花滿地
宮鶯銜不到人間

又

孝武雄才自古今
朱旗常繞碧山岑
年來不見秋鷹出
腸斷相如在上林

又

甲夜猶傳駐御幢一朝芸帙冷明缸蛛絲似也知人事
網徧金泥閃電牕

又

鬼神清問夜徘徊前席曾聞訪異才宣室可憐秋雨暗
憑誰教喚賈生來

題楊龍友山水

不見楊公二十年畫中崖壁尚依然當時若有扁舟在

呼出人間郭恕先

題畫栗

實如張放林中彈皮繞桓公面上髭不是寫生容易得
拾來將療杜陵饑

題查匡來像

入雒當年眼共青雙鬟記曲滿旗亭無端却渡松花水
皂帽藜牀憶管寧

又

丁鶴重歸漸有鬚
柳風桐露照冰壺
吳生解寫多情貌
何不崔徽共一圖

又

倚玉風裁鏡裏開
四筵驚道孟公來
憑教倩得添毫筆
難畫東阿八斗才

上巳梅花

本是東風第一枝
為憐春老獨開遲
好將逸少蘭亭體
寫出何郎閣上詩

水仙

烏几紅牕小貯春
盈盈羅襪淨無塵
不知子建緣何事
却向烟波賦洛神

夢月中游二十四橋

長樂鐘聲入夢間
夢中猶自逐梨雲
采菱船上西風急
一曲紅簫月二分

題范雙玉畫梅冊

鶴飛湖上已年年
老幹猶從筆底妍
冰雪不須疑綽約

前身原是貌姑仙

夾山漾

青簾白舫畫中開
短笛橫簫晚更催
一曲新詞吟未穩
兩山飛翠入船來

雜感

鶯脰湖邊樹欲紅
長年倚楫聽晨鐘
菖川多少浮家處
何日來尋桑苧翁

夏夜偶泊西子湖戲贈笑公

修竹高梧半榻前老僧白髮影蕭然十年着眼南屏路
看盡西湖歌舞船

又

影落雷峯月上天一池荷葉露痕鮮新涼夜半香風起
悟得涪翁不隱禪

過友人齋頭看竹

北郭東門訪隱淪琅玕萬箇碧無塵隣家莫把王猷擬
看竹還應為主人

為鍊崖題畫

無數羣峰蘸墨池白雲如絮擁茅茨絕似郡樓斜日後
道場山北雨來時

為靈巖和尚題畫冊

門對平湖樹齊木魚清磬石橋西他年得遂淵明志
不復煩君過虎溪

贈僧

鳥道千盤入翠微真僧皓首見人稀昨宵直上蓮花頂

剪取山雲補衲衣

又

一鉢胡麻嗽玉泉
鹿麋相伴不知年
遠公猶有名心在
苦向匡山種白蓮

又

老衲惟存鉢與瓶
禪牀趺坐蘚痕青
深林不是長多雨
為有天龍來聽經

汎太湖

欲上金庭苦未能夕陽明滅晚波澄不知萬頃琉璃國
何處清歌唱采菱

過石門有感

三十年前共月明玉簫吹作鳳皇聲而今攜手同蒼鬢
懶向桃花說姓名

又

樂令清言事未遙山丘華屋恨難消憑將醉後羊曇淚
彈向春江作晚潮

嘉禾

淅淅寒波動畫船
南湖春雨細如煙
不知修竹彈何事
冷落鴛鴦一萬年

客有談醉李者戲成一絕

歌舞無端失舊恩
蘓臺響屨總消魂
多情只有王戎李
猶帶東窓指甲痕

平望戲成

謝安手板自無聊
又趁東風送短橈
沙上白鷗應笑我

年年身到畫眉橋

潯溪泛舟

七月新涼暑漸微
荷花深處釣船歸
五湖魚鳥猶相識
爭傍蘭橈不忍飛

語溪道中

岼草青回二月初
語兒溪水碧何如
扁舟十里垂楊路
消得齊諧一卷書

題畫枕

十八年來一欠伸而今穩向釣魚津
扁舟仰睡桃花下不怕槐安告密人

題周天隨祖香堂

罨畫溪頭木葉黃手持詩卷見周郎
烽煙匝地乾坤小不及君家舊草堂

文信國公像

以下二十首咏杭圖長
物為姜仲子學在作

崎嶇江海幾間關
市招魂竟不還
今日何人解惶恐
也應無面見文山

蘓文忠公像

金蓮影裡喚奇才
瘴海顛連老始迴
笑我也同魚鳥性
憶君曾上愛山臺

唾壺

烈士高歌志頗雄
石頭東下竟無功
笑他處仲誠多事
何必敲殘敗乃公

隱囊

五色斑絲自陸離
齊梁子弟坐彈棋
匡牀此日須珍重

鍼線唐宮舊所遺

筆牀

玉臺翡翠艷當時三品今傳寶相枝
獨怪中書老而禿只宜高卧謝烏絲

宋搨閣帖

澄心堂紙廷珪墨舊搨于今不可求
何事宣和遺恨在一時還說太清樓

宣德窰脂粉箱

景陵制作重當時傳看真同大邑瓷不識昭陽誰最寵
曉來妝就賜香脂

瓦燈

午夜熒熒對短檠清瑤嶼裏報寒更誰知得意高吟處
萬樹秋聲一點明

匏尊

吾豈匏瓜事可知一尊閒卧夕陽時人間只有槐安好
便是蚍蜉也不辭

開元石幢

智慧高幢劫屢經石臺猶剩蘚痕青時人若欲知年代
上有歐陽小字銘

蒲團

誰能堅坐學枯禪一片蒲團古壁前識得西來無語意
只應拋向大江邊

博山爐

幾樹高桐綠影深歸來堂裏對牀吟一爐活火心烟裊

且向花前試水沈

著草瓶

縹青粉白自非常
旋汲清泉插海棠
最是護花須聖主
想來青帝即羲皇

烏皮几

琉璃窓扇護書城
掩映寒蕉碧影清
淨拭飛塵間縱筆
刺桐花下又詩成

漆園榻

栩栩初回夕照斜
莊周何意著南華
人生只合如蝴蝶
睡盡江城萬樹花

達摩衣

葉響寒齋夜雪深
番駝高擁正閑吟
遙憐此夕難寤意
肯負西來面壁心

管夫人硯

秘閣才人管仲姬
琉璃硯匣玉珪攜
看來尚作連環樣
未破當年一塊泥

日本藤笠

風雪騎驢太瘦身橫欹同笑帽簷新鯨魚目射波光紫
誰念當時渡海人

黃州竹筆筒

毛穎空為狡兔儔此君坦腹坐相收當年若使元之見
應入黃州古竹樓

書籤

食盡神仙老蠹魚百城高擁水雲居勸君甲乙無煩別

舉世誰知四庫書

遊北山贈性空上人

古木陰森翠影稠
亂香隨屐不知休
山僧相引過溪去
一片白雲教我留

過二峰菴

春半看花取次忙
晚來燒笋飯簪簪
清貧太守閒經過
又費山僧幾日糧

步韻

何處行雲不肯飛夜深香冑鏤金衣
憑將茗上千峯色寫入蛾眉送客歸

又

響屨空傳下玉樓翠煙珠霧態難收
當場錯認何郎粉匿笑花前不轉頭

又

枉殺陳思賦洛神三年辜負鏡湖春
東方莫漫窺千騎舊是青樓薄倖人

贈陸文孫

鶯脰湖邊楊柳春相逢倚楫暗傷神
鄂君繡被知何處腸斷何堪是舊人

趙尚書故姬

舞隊歌筵盛德新芳姿曾掩翠蛾顰
寧知華屋傷心處不負尚書是此人

又

瞥眼繁華不掉頭藥爐經卷度清秋
春申珠履應無數

莫過張家燕子樓

蠡山題壁

千桃萬柳上嶙峋
石室猶傳霸越臣
不是五湖歸較晚
此中應少苧蘿人

虎丘竹枝詞

虎丘山下水平堤
堤上春來碧草齊
分付畫船諸女伴
莫拋紅豆打黃鸝

又

短簿祠傍泊畫船
吳王墓下草芊芊
何能覓得魚腸劍
割斷離愁向兩邊

又

紅紅白白滿桐橋
買得花枝別樣嬌
儂意只憐梔子樹
阿郎偏愛美人蕉

又

開掃梳頭向水窓
真娘墳畔水淙淙
當時豈少同心侶
何不鴛鴦塋一雙

題辰六借書圖

吾家逸少本奇才
旅舍縹緲手自裁
三載騎驢燕市裏
只知原是讀書來

遊虞山得絕句八首

東風吹得燕鶯忙
花底船迴一水香
楊柳長條正無賴
赤闌干畔鬪鵝黃

又

鴨頭新水碧連空
芳草裙腰晚望中
多少樓臺烟雨後

一時間倚夕陽紅

又

藍輿曉出為看山鳥道紆迴未便還何處衣香吹不斷
蛾眉人在白雲間

又

峭壁千尋出世塵下看煙火碧無垠而今始笑黃公望
畫得虞山却贈人

又

絕頂天風吹客衣
滄茫湖海是耶非
青螺認得鄉山影
苦愛桃花未肯歸

又

黃帽青簾十里餘
酒人爭就水雲居
那知東海風流客
盡把沙棠載異書

又

繡被無香燭影青
玉波深處話平生
無端唱出河梁曲
紅淚拋殘為子卿

又

細雨何堪歸思侵玉簫金管閣春陰破山寺裏花深處
猶剩詞人一片心

過亡友故居有感

朱樓一帶映揉藍曾見藏書話玉潭詞賦可憐蕭瑟盡
不留紅豆在江南

又

一代聲名世罕儔西園狎客舊同遊如何劍履塵埋後

難保張家燕子樓

又

舞散歌消碧樹層遺棺空自冑枯藤畫船不少如澠酒
一滴誰澆下馬陵

又

黃襪難尋事可嗟平原空剩夕陽斜行人莫漫傷零落
故國全無玉樹花

無題次六並韻

珠箔無風花自搖
鴉黃蛾綠弄春嬌
依稀記得垂鞭處
亞字青牆宛轉橋

又

臨邛別館見相如
小院桐陰繡榻虛
為問間愁看腰帶
不知偷墜一金魚

又

回眸一笑下簾遲
別後音容細細思
底事梳頭春較懶
惱人花氣燕歸時

又

紫棧熏殘碧篆濃
輕羅衫子畫芙蓉
粧成欲報王昌信
獨背鸚哥小字封

又

齊紈四月薦招涼
魚鱗珠蘭漸吐香
為共蕭郎談舊夢
等閒拋却繡鴛鴦

又

麝香羅褶疊宮衣
薄倖羞他杜紫薇
從此畫簾長不捲

莫教燕子又雙飛

又

縹緲青霞憶鳳簫
淺深更漏短長宵
愁心只似吳淞水
黃歇祠邊早晚潮

賈誼

以下十首詠史

謫去長沙更不回
賈生空負漢廷材
當時絳灌多英畧
何處容君慟哭來

張敞

循良京兆世咸推
帷薄何煩帝問為
但使長安枹鼓絕
不嫌終日畫蛾眉

東方朔

豈有神仙骨絕羣
阿嬌前事不堪聞
東方甘向金門餓
割肉猶然遺細君

司馬相如

一曲求凰向酒壚
世人爭薄馬相如
不知鬚影春風畔
肯上長楊諫獵書

任昉

賓客蘭臺一代稀
桃花載米亦空歸
而今茂灌尋常見
不負西華有葛衣

李白

才子從來定異常
天教供奉救汾陽
可憐酒醒沈香後
獨自崎嶇向夜郎

杜牧

司勳才氣迴難儔
寄託尋花作冶遊
十六衛原無識者

直須明月夢青樓

白居易

江上秋來月滿林香山送客為沾襟同歸白首須臾事
一曲琵琶獨至今

蘓軾

怒罵能將嬉笑侔子瞻千古擅風流奇才但得君王歎
飽飯何妨到惠州

陸游

壯氣雄才不易刪
渭南詞客老投閒
平生多少淒涼志
鐵騎西風大散關

訪鱸香亭不得

遺亭無跡暮烟空
釣叟收綸看落鴻
不是近來鱸膾少
阿誰冷眼向秋風

和龐大家香奩瑣事雜詠

春入鸞紗日較遲
白梅花下立多時
無端拗取高枝戴
惹得東風上鬢絲

又

昨夜紅薇一朵開
膽瓶新築避風臺
慙慙更放泥金幔
恐有尋香鳳子來

又

粧次傳書特地忙
嗔他小玉戀迷藏
錯將京兆修眉管
並卧湘妃翡翠牀

又

生性天然淡冶中
羞將顏色鬪春風
新來不著燈籠錦

一色丈羅染退紅

又

檢點珠奩似少歡
釵梁擎出要郎看
昨宵喚喚收粧急
誤損金絲九子鸞

又

細編偷把背花吟
脂印猶嫌玉甲侵
讀到白頭山上雪
一時彈淚為關心

又

戌字初傳報夜牌卸頭猶未下瑤釵不知夫壻輕狂甚
倚醉偷量獨見鞋

又

夜展羅綉坐綺窓盡燒椽燭換明缸誰堪暖手偎紅袖
拂亂宮牙十六雙

又

斂眉深坐費深思一着文楸局兩持賭取玉釵渾細事
就中黑白要郎知

又

江草湘花展卷看春風隨手拂雕欄趙家公子歸來日
莫買徐熙墨牡丹

又

稻畦衫子映花明繡佛幢前禮拜輕傳語八關今日是
厨娘莫費鯉魚羹

又

盡卸鸞鬟向鳳窠薔薇湯裏學凌波窺人怕有多情月

繡幕層遮脫絳羅

又

暗香中夜吐金花
漫道紅窓少伯牙
一寸眼波橫兩黛
高山流水是兒家

又

紫棧偏宜靜處焚
金爐銀葉共郎薰
請看心字成灰後
盡作巫山縷縷雲

又

好日新將繡帖開合歡羅勝一雙裁雛鬟不識春猶淺
已訝釵頭燕子來

又

錦帶銀球次第懸手丸瓊粉拜郎前燈邊好語憑誰道
願似花糝個個圓

又

繡罽紅茵別樣嬌街蟬曉食每親調愛他生小多憑準
一線圓睛兩度潮

又

亞字青牆柳帶斜
春來間事有些些
嗔他小玉無聊賴
慣上江樓喚賣花

又

念得新詩教雪衣
水晶簾外語依稀
春來漸喜相偎熟
縱解金縈也不飛

又

近風來處著紅繡
小拜花前願蜜添
身是百花原任採

不知何處使人甜

又

寒食今朝春事賒
釀成仙液似飛霞
杯中更接桃花汁
只要郎身總是花

又

春駒輕粉尚沾香
浪惹輕羅已自傷
還向海棠深處放
莫教孤影宿紅房

又

荷芰風清薤葉涼
輕雷一震隱橫塘
生憎簾幙斜陽色
半是兒家額上黃

又

寶鏡盤龍影
歛空
猛然驚見下簾櫳
憑誰得向江心鑄
先着傾城在此中

又

填鵲靈期正
早秋家家瓜果坐針樓
生憐銀漢難為別
却替雙星夜半愁

又

寒到深閨要綺襦
窓前札札弄機杼
而今織素渾無用
花樣隨時問小姑

又

花壓重檐影漸偏
貪看靈兔不成眠
嫦娥既有長生藥
何不將人並上天

又

翅拍晨霜未穩棲
曉來窓下打籠雞
怪他只喚相思夢

不向侯家枕畔啼

又

養得金魚近繡窓
錦鱗朱鬣一雙雙
夜深忽怕琉璃凍
自撒重茵裏玉缸

又

天涯着處舞楊花
剪剪輕風透碧紗
闌鴨蘭邊寒未減
紅泥長護鬱金芽

又

銀牆東畔畫欄低
斑笋新抽尚帶泥
煮得青梅同下酒
合歡花上畫眉啼

又

菖蒲新綠細堪梳
崑石玲瓏嵌碧虛
一研冷雲花影下
鮑娘新折大雷書

又

人間何處有瓊霜
倚檻微吟只淡粧
百尺小樓雙燕子
謝家春色在斜陽

水邨春曉圖

水竹平生少定居每看烟樹興蕭疎無端偶逐輕風去
長憶桃花好鰕魚

梅花書屋圖

漠漠寒林影不分啁啾么鳳曉來聞梅花萬樹香多少
薰透前山嶺上雲

京口即事

江風江雨獨登臺聽罷琵琶首重回不使客囊留一物

也知原為看山來

又

木葉蕭蕭秋氣新
江聲直上更無塵
平生來往誰能識
只有金焦是故人

梅旅度曲用秋宵聞歌四字為韻

高館銜觴散客愁
重來杜牧憶青樓
無端一曲江南弄
庭樹蕭蕭不忍秋

又

作計支吾夜漏遙紅絃碧管韻爭調吹殘二十四橋月
不負揚州是此宵

又

空庭落葉夜紛紛車子清謳過綵雲醉裏醒來還復醉
就中孤客最難聞

又

曲巷相呼夜更過何戡白髮老婆娑漫天風雨愁歸路
如此乾坤肯不歌

春寒

何處春寒入謝家
春衣綿薄又重加
無端一夜東園雨
遲放海棠三日花

補種平山堂楊柳

何人新種綠陰齊
六一堂高古竹西
却笑隋堤千萬樹
近來無處著鶯啼

竹西春遊曲

花柳千枝拂路行
大家車馬趁新晴
那知九曲池邊水

流盡當年歌吹聲

又

紫幃車中額畫黃軟塵飛過認衣香怪他醉客眠芳草
元是陳隋舊戰場

又

金銜驕馬錦帆舟簇簇笙歌楚水頭最是江南好山色
春來都在十三樓

又

關雞臺畔草痕青
結束新粧肯暫停
可惜隋宮清夜曲
至今留與健兒聽

題吳孟舉黃葉村莊圖

聞道藏書別起樓
西園名士幾同遊
十年夢到何年到
爛醉駕湖萬樹秋

又

昔年曾泛語兒溪
最愛斜陽綠影迷
今日畫圖閒拍點
草堂深處碧山齊

書屋中雙燕新來壘巢未定特以招之

花底交飛綠影開
銜泥欲定更徘徊
昭陽宮裏多猜忌
莫為茅簷不肯來

又

柳影梧陰映畫梁
芹泥何事為銜將
天邊不少連雲廈
認取先生舊草堂

紅橋絕句四首

城北風光絕點塵
垂楊個個鬬腰身
榆錢飛盡荷錢出

買斷揚州十里春

又

金谷園西倚赤欄
內家妝裏任人看
就中獨有鴉鬟子
學得銀箏不肯彈

又

水檻迴環抱小樓
人家排住藕花洲
錦韉畫槳知多少
輸却閒情付白鷗

又

海會山前走鈿車王郎題字尚籠紗誰憐杜牧輕狂甚
夜半燒燈為看花

遊清涼寺

踏徧金蓮戰血腥秋山未了六朝青松陰一帶齋鐘午
不是春風九子鈴

又

老樹槎枒覆廢池苔生玉甃綠參差逢人欲問胭脂井
頭白山僧總不知

吉祥寺看梅

塵滿空廊日影斜
壁間無字可龍蛇
肩輿十里秋山晚
獨為寒梅一樹花

旅懷

茭薦藜牀夜不眠
客心如火向秋然
窓前為傍烏啼樹
長有西風在枕邊

又

秋雨淒淒不肯晴
攪和梧葉作秋聲
寒蟬本是離魂化

夜夜長啼到五更

又

一線長江未易歸
離鴻偏向客邊飛
清霜不為窮途緩
先送新寒透葛衣

又

揮扇前朝暑未還
一宵寒雨遍青山
蒼天也似人情改
容易炎涼頃刻間

俞錦泉招觀女樂席間得斷句十首

明月曾傳醉二分玉簫清響過行雲而今又買吳陵酒
顛倒樊川是舞裙

又

流香小閣影參差十樣蛾眉鬪一時就裏寒簾能巧笑
不知誰合比紅兒

又

綠珠長笛妙隆箏不作人間第二聲若使謝公曾入耳
肯拋心事為蒼生

又

嫋嫋驪珠淡淡粧天然無復換鵝黃人生只有情堪死
莫把傷心問麗娘

又

絳蠟搖光酒氣春小紅來去逞腰身生憐薄倖元丞相
腸斷東風記會真

又

芙蓉雙靨向秋鮮何粉輕沾分外妍賺得紅樓人愛煞

不知原是小嬋娟

又

珮玉釵金見未曾
領巾題字我猶能
當筵不用求鳳操
才子由來在茂陵

又

歡場何處有旄頭
一夜樽前鼓未休
猿臂只今無用處
溫柔鄉裏暫封侯

又

紫雲一笑定如何老去參軍興未磨
採取江南紅豆在一宵惆悵為情多

又

公瑾知音一代稀美人都唱縷金衣
牡丹會上能重到壓帽狂花不忍飛

除夕前一日哭長兒參成十首

華筵心動便歸來鵬下寧知事可哀
風雪漫天燈火暗蒼天有意虐多才

又

心傷負米志終違
俯枕長吁涕更垂
只為高堂雙白髮
曾無一語及妻兒

又

詞賦安能動帝閣
玉樓偏召李王孫
平生何事應天譴
破柱當年似寡恩

又

少小多愁只為貧
頻年憔悴向關津
可憐廩吏終何益

清白翻能累後人

又

當年才調擬相如豈意無端賦子虛
嘔盡血痕何處覓
丹黃猶剩半牀書

又

詩懺空傳句足憐那知未別已迤邐
長沙自是傷心地
慣向秋風哭少年

又

一雨何期八十朝
哀哀嫠婦哭寒宵
東皇似有憐才意
落盡春紅不自聊

又

年年珠樹鎮相攜
誰信慈明運不齊
空有茂陵遺稿在
三芝無復舊時題

又

空房夜夜聽啼鳥
腸斷東風泣鳳雛
一對麻衣小兒女
有誰還信掌中珠

又

沈疴難起為儒冠三上無成淚眼酸曾似東陵樵牧豎
不教識字且團團

蕪關觀競渡作竹枝詞

青簾一片水中央搖漾晴波映額黃就裏何人似桃葉
漫將團扇賺王郎

又

木蘭雙槳逐時新玉箸金盤饌錦鱗坐上琵琶渾未解

可憐都是販茶人

又

丈鱗朱鬣怒如雷
歎乃齊聲去復回
多少闌干人駐目
不知誰奪錦標來

又

誰將歌吹說揚州
此地從來據上游
却笑小姑娘態好
新粧開掃按箏篴

彭澤縣絕句

折腰興懶賦歸來元亮平生一酒杯只怪黃花無種子
不曾留與後人栽

又

古人誰比復誰傳宦海浮蹤絕可憐笑我官應勝彭澤
歸來種秫竟無田

女兒港二首

遙山隱隱帶波光欲畫蛾眉未便長只合小姑娘相伴住
莫教容易嫁彭郎

又

芙蓉插鏡學梳頭一派橫波入眼流為識洞庭曾錯配
盈盈珠珮尚含羞

舟中卧月

竹舍人稀晚柝殘沙邊月色照波寒今宵一樣嬋娟影
三處人應各樣看

又

西江日夜水爭流一片清光欲向秋猶是隋橋好明月

可憐欹枕在扁舟

登八境臺和東坡韻

遙睇丹霞接蜃樓
江城如畫坐銷憂
憑欄竟日無人識
倦客由來是醉侯

又

浮蹤汗漫未知還
庾嶺梅花待雪寒
十幅蒲帆何處泊
碧雲無盡是南安

又

西江環湧雪成堆水國蒼茫八境開我較東坡身已隱
不妨鷗鳥共頻來

又

岩堯畫閣夕陽明萬里天風吹酒醒欲夢揚州是何日
垂楊青繞竹西亭

又

悔不求仙與坐禪半生蹤跡尚淒然章江不少桃花水
輸與漁郎返棹先

又

一派江山杳靄中
欲將圖畫問王蒙
無端更向羊城去
遙指紅雲出海東

又

朗吟終日坐高臺
恨不新豐酒甕開
禪客莫須頻問取
先生原是舊吳萊

又

沙邊烟水碧差差
秋到人間客早知
一卷離騷渾未了

不堪重作斷腸詩

夜雨

潺潺簷溜響空亭
半枕新寒酒乍醒
妬殺鴛鴦夢中客
五更同雨不同聽

新婦石

嫁得南康未即回
臨流豈為望夫來
只愁粧裹非時世
暫借秋江作鏡臺

又

新簇山花繡錦襦何來水畔采靡蕪
嘗美要得慈姑性為學龐家煮鯉魚

席中偶談羅浮神蝶賦以紀之

聞說仙姑有繡衣化成神蝶世應稀
橫身金翠人難見獨向梅花香處飛

又

神卵探來亦偶然蛻成逐伴更翩躚
仙霞片片隨風起五色寧教濁世憐

題天寧禪院示自叅上人絕句三首

浪跡天涯欲暮年
遠公相遇共逃禪
學書自有菩提業
不用芭蕉號綠天

又

亂後珠宮盡劫灰
空餘斗室掩蒼苔
健兒繫馬千羣在
敢為支公愛駿來

又

閒雲一片偶來遲
夢破繩床有所思
徹夜悲歌喧戍客

不須重詠皎然詩

贈維清

追隨千里更踟躕
潭水桃花意有餘
醉後片言君記取
鏡湖春雨一床書

入宜章界

兩載棲遲越水濱
無端流轉又關津
平生愛寫離騷讀
今日身為楚國人

舟阻磊石作唐多令一闋焚禱于洞庭君是夜

得南風以濟因作小詩以昭神貺

新詞一闋化湖濱夜半驚濤似有因
安得神明長借力
盡吹天下欲歸人

過武侯祭風臺

崔巍一片撼江隈百萬雄師竟未回
吳蜀祇緣分王氣
東風寧必待登臺

琵琶亭

蘆花楓葉雨蕭森寂寞空亭遂至今
自是逐臣雙淚盡

不關商婦少知音

為友人催粧

鸞釵偏愛辟寒金
十斛明珠覓賞心
揀得一枝紅芍藥
春風鬢影對彈琴

又

平陽公子劇多情
選取眉山兩黛橫
南國有香銷未盡
月明重聽玉簫聲

又

渡江曾說有瑯琊
桃葉如儂亦未賒
但把郎心比潭水
可能深得似桃花

又

青菱光映帶
初拈腮半紅
斜曉意怏却怪
牕前看未足
梳頭還下水
晶簾

題汪丈冶荷鋤圖

倦歸擬老漢
陰身羨爾先
為荷鍾人異
日圖成向桑
苧不妨添畫
葛天民

種字林閒居雜詠三十首

避人嘗擬似君公
新得茅堂郡郭東
買宅莫論多少值
滿庭寒碧是新桐

又

酒壚茶竈日從容
此地幽偏足養慵
萬縷垂楊三畝菊
雨窓無夢到臨邛

又

木榻斜支對石幢
藥鐺經卷傍西牕
水田莫訝栽官繭

我已全家學老龐

又

新開小徑綠參差
盡種琅玕為竹癡
不是王猷偏愛看
此君孤直最相知

又

長紅小白露華肥
雨過山房擁翠微
幾日掩關無客到
春風鬢影對金徽

又

捫腹徐行午飯餘松陰百尺共蕭疎朝簪拋後應何事
不是窮愁也著書

又

今年準擬學潛夫酒枕詩篇泛五湖昨為看山才一出
被人偷畫醉翁圖

又

桃李無言自作蹊垂楊舞罷綠雲低兒童未許輕攀折
借與黃鶯儘意啼

又

愛客平生是素懷
那能獨坐掩茅齋
昨宵貪與公榮飲
又典香奩一股釵

又

寂寂林陰掃綠苔
元龍湖海氣難灰
夕陽欲下淳于醒
笑看蚍蜉入大槐

又

門巷全無車馬塵
梅花香處著綸巾
却嫌剝啄驚栖鶴

猶有文園買賦人

又

寫罷羊欣白練裙
竹煙花霧坐氤氲
那消天下三分月
且貯山中幾片雲

又

為訪羅浮雪裏村
歸來長物已無存
惟留陸賈南遊劍
欲報夷門一顧恩

又

初夏猶餘麥秀寒布袍雅稱竹皮冠五陵裘馬多輕薄
一笑何勞洗眼看

又

封侯無骨只宜閒未學神仙且學頑莫怪嵇康情太懶
家人都愛住青山

又

夷甫從來恥道錢長門何必漢金傳而今潤筆尤非易
一樹名花字一篇

又

蕭郎樓傍月明橋步屨相過亦未遙正是五陵裘馬地
不妨閒處着漁樵

又

占得隋堤一把茅綠毛么鳳挂林梢平生知己惟冰雪
欲取梅花種作巢

又

風舞虬松日怒號移家如傍廣陵濤此中合署清涼國

好取離騷下濁醪

又

賓客頻年已不過
翟公無用更張羅
留他瓦雀陰晴噪
聽作南山種豆歌

又

石磴臨風自煮茶
元卿三徑綠雲遮
平生為有栽花癖
不愛東陵五色瓜

又

青簾疎簾白晝長
杜陵初有浣花堂
東牆更欲添茅閣
選個青山看夕陽

又

蠻觸寧堪日鬪爭
灌花鋤菜了餘生
也知管樂成何事
不是南陽未易耕

又

露葉烟條一小亭
無人相對眼常青
不知五百餘年後
誰識揚雲一卷經

又

一曲新詞酒一升
夜來清夢亦何曾
誰教種得芭蕉樹
燒盡南牕聽雨燈

又

卧起高齋總自由
儘教匝月不梳頭
山中那識人間貴
翻笑雲谿號醉侯

又

一方竹簟一張琴
醉後還為梁父吟
莫訝衣裳多翠色

草龍珠帳正垂陰

又

疏食常將玉版參麀毛揮落只清談却慚米汁猶難斷
彌勒原須共一龕

又

讀罷殘經更下籤賦心蕭瑟老江淹三更猶自耽孤坐
花影渾身月一簷

又

萬里歸來落布帆東園花竹似蒼崑北山莫把移文誦
已剪芙蓉處士衫

倚欄

聲聲曉雨送春寒早起花前獨倚欄只恐東君少憐惜
待他雨止已花殘

種字林雜詩

去年栽竹遶茅堂春後俄看錦籜長忍得老饕纔半月
千竿碧玉已過牆

和畢正持夏夜書事

誰向南來鞭火龍
隙光愁見午雲紅
我家獨有松千尺
不待彈琴已有風

又

輕雲一霎午來過
滿院清陰散薜蘿
新竹繞簷桐繞砌
已晴偏覺雨聲多

又

門外朱軒袞亂塵
北窓跂足夢初伸
炎蒸那用玄冰散

我是人間不熱人

又

靜夜科頭倚曲廊
桃笙不捲竹方牀
獨支如意無人見
滿地桐花月影香

又

曲徑斜連一小亭
滿簷寒碧畫青冥
幾株老樹千竿竹
盡作西窓夜雨聽

又

靜掩疎簾罷奕棋日長偏與黑甜宜
蟬聲一枕桐陰午正是槐安尚主時

次孝威聞瑋原韻

知己關心四十年論文莫向百花前
獨憐零落羊碑後誰作孤寒尺五天

又

朋舊分飛年復年人間何事可如前
請看琴酒當時客明月誰能共一天

又

河梁蘓李已經年
霜鬢蕭疎覺勝前
百尺樓頭詩一卷
碧雲何似在吳天

又

曾和香奩只幾年
安仁憔悴不如前
玉臺一片文心在
合向煙霞小有天

午日至淮陰次家文仲姪

疊鼓驚鼙兩岸聞
錦標爭奪浪花紛
濁醪自引曾騰睡

善讀離騷只有君

又

佳節蕭齋忽叩門
小花蠻榼送芳樽
更探古錦囊中句
喚醒江潭屈子魂

白髮傷春二絕句次廣霞韻

秋千紅颭夕陽旗
鶯語丁寧是此時
一日乍晴還乍雨
東風無奈小桃枝

又

聞道橫塘走鈿車玉鞭相趁帽簷斜無端一陣輕狂雨
驚落滿堤楊白花

次自遠韻奉輓蛟門

纔占大衍過歸奇厄遇龍蛇忽此期惆悵平泉花正發
新詞一曲更何時

又

拂衣歸卧掩書堂一詠隨君更一觴今日玉京高處去
何如世路有羊腸

又

如此英華竟不留人間輕薄豈無由
老天自不容才俊狙獐從來易白頭

又

去秋分手菊花前妖夢新傳或未然
可奈蓬萊無近信一回小別又千年

揚州柳枝詞十首

楊柳青青覆大堤花開那復問高低
無端嫁與春風去

一點東來一點西

又

隋堤柳下綠窻疎碧玉何曾駕鈿車
自逐劉家舊雞犬
儘從時世鬪妝梳

又

邗水東來碧似油垂楊一帶起朱樓
誰將當日隋宮地
改作山塘半日游

又

欲向郎前事事諳一時裝裹薄吳蠶春衣裁得從人看
花樣新來出海南

又

玉鉤斜畔草蕭蕭騰有新粧倚畫橈金管不須船送酒
一行青紵小紅橋

又

春到平山事若何香車寶馬日經過送生堂裡鞋兒好
竹院何曾拜普陀

又

怒馬鮮衣滾陌塵一番烽火一番新
凌雲但有黃羅蓋何必相如賦大人

又

灼灼高冠燦燦裳烏衣門巷好兒郎
橫肩十里重城內街卒難容杜牧狂

又

義濟橋橫郡郭邊金爐寶鼎雜龍涎
如何秦掾紅樓下

姹女妝成慣數錢

又

竹西歌吹幾人聞
明月馮誰說二分
我是參軍徒有賦
不堪城上看斜曛

夢健菴

布帽籠頭不出迎
故人相見眼重明
蓬窓一片三更月
猶喜春江不世情

喜晤火傳

蕭蕭白髮不堪簪二十年来一再尋
此日歸耕無寸土應憐茗水舊時新

題鄭超宗九峯雪霽圖

滎陽當日顧厨間點染雲溪意獨閒
一自影園花落盡更無名士愛青山

題黃荃畫三生石上圖

瞿塘烟水自粼粼石上聞歌跡已陳
只有西泠橋畔月夜來猶似照情人

又

改面回頭日漸非多生心事此生違
葛洪井畔無相識
手指長松一笑歸

題撫松圖

傲骨生憐本共殊時時靈壽為君扶
看看漸長蒼龍甲
莫愛秦家五大夫

八月梅花

遙望羅浮木葉黃南枝驚地見春光
美人自愛秋來月

肯讓金鷄第一香

八月海棠

白帝窮秋絕可憐
花中何意見神仙
碧雞坊裏淒涼客
猛向西風又作顛

八月梨花

月色溶溶夜正涼
一枝宮粉出瑤房
青旗不用重相趁
玉露今能為洗粧

八月桃花

露井風高木漸彫
豈知紅艷轉天嬌
但教人面能長在
那有悲秋恨不消

擬寄江夏君

泛泛蘭舟晚更橫
鳳皇城下走灘聲
炎州秋盡猶餘暑
莫取寒砧擣月明

又

萬里章江雪浪催
聶都山畔首重回
遊人不似章江水
更過梅花國裏來

江雨

秋江水涸木蘭橫齒齒沙中自有聲
多謝始興連夜雨
寒潮添尺送人行

無裘

鷓鴣典酒度殘春海國新寒苦殢人
却笑遊秦蘇季子
黑貂猶在未為貧

班婕妤

舞袖歌絃易惹塵從來恩寵日相親
無端一下黃金輦

便有推排團扇人

九日登學士山題石


蕭蕭木葉下晴沙
塞雁橫天帶晚霞
滿目河山聞戰鼓
不知何處種黃花

與楚雲

偶然乘興泛仙槎
一啜胡麻便憶家
恹然劉郎歸去速
至今猶在誤桃花

又

一笑花前意自親
乞詩還脫紫羅巾
從來莫問揚州杜
舊是青樓薄倖人



林蕙堂全集卷二十二